

CONVENIO DE COLABORACIÓN ENTRE O CONCELLO DE LALÍN E A “ASOCIACIÓN CULTURAL BOLARQUEIRA”, PARA A CELEBRACIÓN DO FESTIVAL X NOCEDA ROCK (2026).

Expediente: 1139/2026

REUNIDOS:

Dunha parte, Dña. Begoña Blanco Blanco, **Concelleira Delegada de Turismo e Cultura do Concello de Lalín**, que actúa no seu nome e representación, de conformidade co establecido nos artigos 61 da Lei 5/1997, do 22 de xullo, de Administración Local de Galicia, e 21 da Lei 7/1985, do 2 de abril, Reguladora das Bases do Réxime Local.

Pola outra, D. Pablo Romeo Chorén, DNI.: ***4132***, na súa condición de **Presidente da “Asociación Cultural Bolarqueira”** (G94163722), e domicilio social no lugar Noceda de Abaixo, nº3, 36512, Lalín, de acordo co pacto adoptado pola Asamblea Xeral da Asociación de 16 de decembro de 2022, que actúa no nome e en representación da devandita asociación, segundo as facultades que lle outorga o artigo 23 dos seus estatutos, vixentes a día de hoxe.

EXPOÑEN:

Primeiro. Que entre as competencias que lle corresponden ó Concello de Lalín, de conformidade co establecido no artigo 25.2, letras h) l) e m) da Lei 7/1985, de 2 de abril, Reguladora das Bases do Réxime Local, se atopan as que se refiren á información e promoción da actividade turística de interese e ámbito local, promoción do deporte e instalacións deportivas e de ocupación do tempo libre e á promoción da cultura e equipamentos culturais.

Segundo. Que ambas entidades son conscientes da necesidade de favorecer as condicións para a mellora da calidade de vida da poboación rural e a importancia que ten para dita poboación a posta en valor da propia contorna de xeito que permitan que as xentes que viven no campo se sintan vinculados ao seu territorio, a través dunha adecuada oferta no ámbito da cultura, do turismo e do ocio, que permitan a mellora das condicións de socialización e interrelación da veciñanza do noso Concello.

Terceiro. Que as asociacións e demais entidades culturais sen ánimo de lucro xogan un papel destacado nesta labor de dinamización. Concretamente a **“Asociación Cultural Bolarqueira”** ten como obxectivo principal impulsar todo

tipo de actividades preténdese dinamizar a súa contorna, cunha programación de xeito anual, en distintas datas, en espazos públicos como o Centro Social ou o Campo da Festa pero priorizando lugares do medio natural como a contorna da Carballeira de Lamas.

Entre as iniciativas/actividades que se realizan neste proxecto, atópanse: ciclo de cinema, andainas e roteiros, encontros literarios, exposición de arte, funcións de teatro, actuacións musicais, recollidas de lixo, etc.

Pero, sen dúbida, unha das actividades máis relevantes e de maior repercusión é o festival de música Noceda Rock.

Cuarto. Que esta Asociación é unha entidade sen ánimo de lucro, inscrita no Rexistro Central de Asociacións da Xunta de Galicia co núm.: 2018/022285-1, con personalidade xurídica e plena capacidade de obrar para o cumprimento dos seus fins e que ten como obxectivo principal manter vivo o rural na parroquia de Noceda, promovendo e apoiando a súa labor a prol de recoller e conservar a lingua, a cultura galegas e o turismo rural en Lalín e na Comarca de Deza, en xeral.

Quinto. Que a Asociación Cultural Bolarqueira leva anos desenvolvendo en Noceda actividades que dinamizan a vida cultural e as relacións veciñais, con múltiples proxectos de fomento da música, teatro, cine, lectura, medio ambiente, etc...

Sexto. Que dada a singularidade e características das actividades que se van desenvolver acollidas ao convenio, soamente poderán levarse a cabo pola citada Entidade que, ademais, dispón de experiencia e medios humanos a través do persoal da propia asociación. Trátase dun referente único en Noceda e polo tanto, non resulta posible promover a concorrencia pública para levar a cabo as actividades previstas no convenio.

E dado que o Concello de Lalín e a **“Asociación Cultural Bolarqueira”** teñen un **interese común e coincidente na promoción e potenciación da cultura** dentro do seu ámbito de actuación, manifestando a súa vontade recíproca de colaborar a tal fin, ámbalas dúas Entidades acordan a sinatura deste convenio de colaboración, que quedará suxeito ás seguintes,

CLÁUSULAS:

Primeira. Finalidade

Este convenio ten por obxecto a concesión dunha subvención nominativa para a Asociación Cultural Bolarqueira, para a celebración do FESTIVAL NOCEDA ROCK 2026.

Segunda. Compromisos da Asociación Cultural Bolarqueira

Coa sinatura deste convenio, a Asociación Cultural Bolarqueira, comprométese a:

1. Facer constar en **lugar ben visible a colaboración do Concello de Lalín** utilizando para tal efecto os seus anagramas ou logotipos, na forma que se lle indique, en todas as actuacións informativas e divulgativas, así como as posibles publicacións que se fagan relacionadas coas actividades do convenio, que estarán sempre en lingua galega (difusión da colaboración).

2. Festival Noceda Rock

Celebrarase a X edición do Festival de Música Noceda Rock os días 13 e 14 de xuño do 2026 na parroquia de Noceda, Concello de Lalín.

Este, celebrarase nunha contorna natural conformada pola Carballeira de Lamas e o Rego de Lamas. Na súa contorna tamén se encontra a Capela de Lamas e nas súas proximidades cinco muíños. Conformando así, un espazo para a celebración do festival ubicado nunha paraxe natural que acolle cada edición a centos de persoas.

O festival no só destaca pola celebración de concertos de música ao vivo nun espazo natural aberto, senón que engloba dúas xornadas con diferentes actuacións e actividades para todos os públicos con entrada de balde e acceso libre.

Este evento é organizado por mozas e mozos da parroquia, membros da Asociación Cultural Bolarqueira.

3. A Asociación comprométese a a realizar a edición garantindo a asistencia de público de xeito gratuíto. Os gastos xerais para a realización do festival Noceda Rock 2026, segundo indican na memoria valorada, son superiores a 30.000 euros.

Terceira. Compromisos do Concello

Pola súa banda, o Concello de Lalín comprométese a colaborar na realización das actividades da Asociación, achegando un importe de **cinco mil euros (5.000 €)** durante o ano de vixencia deste convenio, aportando a Asociación a cantidade restante que resulte precisa para a realización das actuacións relacionadas na cláusula segunda que antecede.

O pago desta subvención levarase a cabo na forma indicada na Base 32 e seguintes de execución do Orzamento Xeral do Concello para o ano 2026.

Serán subvencionables aqueles gastos nos que incorra a Asociación para o desenvolvemento das actividades indicadas no período comprendido entre o 1 de xaneiro e o 30 de novembro de 2026.

Esta achega será compatible con calquera outra das demais Administracións Públicas, sempre e cando a suma total das mesmas non supere o importe xustificado pola Asociación en cada exercicio.

A percepción desta contía, será incompatible con calquera outra clase de subvención, axuda ou ingreso económico por parte do Concello de Lalín para o desenvolvemento das mesmas actividades.

Cuarta. Xustificación e pagamento

A “Asociación Cultural Bolarqueira” queda suxeita ás actuacións de comprobación que desexe efectuar o Concello de Lalín así como a calquera outras de comprobación e control financeiro que poidan realizar tanto o Consello de Contas como Tribunal de Contas e Intervención municipal, conforme ao artigo 14 da Lei Xeral de Subvencións, e a xustificar a cantidade recibida; e para tal efecto deberá presentar, con data límite do 30 de novembro de 2026, a seguinte documentación:

- Unha memoria da totalidade da actividade realizada que conterá unha relación do desenvolvemento do Noceda Rock, e unha relación clasificada dos gastos por cada actividade feita, con identificación do acredor e do documento xustificativo, o seu importe, a data de emisión da factura, e a data de pagamento, de acordo co artigo 75 do RD 887/2006 do Regulamento da Lei 38/2003 xeral de subvencións (LXS).
- Orzamento detallado de ingresos e gastos das actividades subvencionadas.
- Facturas orixinais (con tódolos requisitos esixidos polo R.D 1619/ 2012 de 30 de novembro) ou documentos de valor probatorio equivalente no tráfico xurídico

mercantil ou con eficacia administrativa polo importe total do gasto subvencionable, ao abeiro do establecido no artigo 30.3) da Lei 38/2003 de 17 de novembro (Lei xeral de subvencións e o seu Regulamento).

Deberán ser orixinais, expedidos pola empresa subministradora dos bens ou servizos. Admitiranse copias compulsadas polo propio Concello, non obstante antes de realizar as fotocopias e compulsas das mesmas estamparase nos xustificantes orixinais un selo coa seguinte lenda: "En cumprimento da Lei 38/03 esta factura foi utilizada como xustificante do gasto para a obtención da subvención de colaboración nas actividades da asociación por parte do Concello de Lalín no ano 2026".

Asumirase o compromiso de aportar os orixinais no momento que lle sexan requiridos.

A factura deberá vir especificada en moeda local e recoller a data de emisión da factura. Deberá constar na factura unha explicación do gasto. Se, a criterio do Concello o xustificante non é o suficientemente claro neste aspecto, deberá vir acompañado de nota explicativa da que se deduza unha clara relación do gasto coa actividade subvencionada.

Conterá os datos identificativos do expedidor (nome, apelidos, denominación ou razón social, NIF e domicilio).

Conterá os datos identificativos do destinatario que deberá ser a entidade subvencionada (nome, apelidos, denominación ou razón social, NIF e domicilio).

Incluirá unha descrición detallada e prezo unitario da operación e o seu custe total, importe pagado e moeda. Deberá detallarse o IVE correspondente ou imposto equivalente para o seu caso, que estea en vigor no país de emisión da factura. Cando a cota se repercute dentro do prezo deberá indicarse "IVE incluído".

- Xustificantes de pago das facturas ou documentos de valor probatorio equivalente no tráfico xurídico mercantil utilizados para a xustificación. Só se admitirán os pagos realizados mediante transferencia bancaria ou cheque, polo que as facturas deberán acompañarse do correspondente xustificante de dita transferencia ou pago por cheque.

No caso de que se teñan realizado pagos que traian consigo retención de IRPF deberán presentar o correspondente modelo xustificativo de ter realizado o ingreso de dita retención na Axencia Tributaria.

- Declaración xurada sobre a obtención de axudas para a mesma finalidade procedentes de calquera outra administración pública ou de particulares ou de entidades privadas tanto aprobadas como pendentes de resolución.
- Achegar certificación IBAN do número de conta corrente á que deba transferirse o importe da subvención, segundo as normas establecidas pola Tesourería Municipal.
- Certificación de que o beneficiario se atopa ao corrente no cumprimento das súas obrigas tributarias e fronte á Seguridade Social, no caso de que non puidera obter eses certificados o Concello e o prazo de validez dos xa presentados xa rematara, conforme co estipulado no apartado e) do artigo 14 da lei 38/2003 de 17 de novembro.
- Declaración xurada expedida polo Presidente relativo ao desenvolvemento das actividades polo que se acredite que a subvención foi destinada á finalidade para a que foi concedida.
- Declaración xurada sobre a obtención de axudas para a mesma finalidade procedentes de calquera outra administración pública ou de entidades privadas, tanto as aprobadas como as pendentes de resolución.
- Acreditación da difusión da colaboración do Concello de Lalín nas actividades mediante mostras gráficas.

O gasto xustificado documentalmente deberá acadar, como mínimo, o importe a que ascende o orzamento de gastos. De non xustificarse o total do orzamento de execución do Convenio, o Concello de Lalín minorará a súa achega proporcionalmente.

Quinta. Entrada en vigor

O prazo de duración do convenio será dende o día da súa sinatura ata o 31 de decembro de 2026, sen prexuízo de que serán subvencionables os gastos nos que incorra a Asociación para o desenvolvemento das actividades indicadas na Cláusula Segunda no período comprendido entre o 1 de xaneiro e o 30 de novembro de 2026.

Con todo, poderá extinguirse anticipadamente por acordo mutuo e voluntario das partes, por desestimación ou denuncia dalgunha delas, ou por incumprimento dos compromisos adquiridos, que se comunicará de xeito fidedigno, previa audiencia da outra parte, cun mínimo dun mes de antelación.

Sexta. Comisión de seguimento

Para garantir o cumprimento deste convenio, créase unha comisión paritaria mixta de seguimento, constituída polo Alcalde do Concello de Lalín ou Concelleiro/a en quen delegue e o Presidente da Asociación Cultural Bolarqueira en cada momento, que coordinará o seu desenvolvemento e estará facultada para resolver cantas dúbidas xurdan na súa execución, sendo os seus acordos de execución inmediata.

En caso de dúbidas na aplicación deste convenio corresponde a resolución das mesmas á Alcaldía previo informe da Secretaría e a Intervención municipais.

Sétima. Causas de resolución e reintegro

A maiores do establecido na cláusula quinta anterior, o presente convenio resolverase:

1. Por incumprimento total ou parcial dalgunha das estipulacións indicadas no convenio.
2. Polo transcurso do tempo estipulado sen que se culmine o mínimo volume de actividades acordadas no acordo.

Son causas de reintegro da subvención, xunto cos xuros de demora correspondentes dende o momento do seu pago, as establecidas no Título II da Lei 38/2003, do 17 de novembro, Xeral de Subvencións.

Oitava. Protección de datos de carácter persoal

As dúas partes, comprométese a cumprir en todo momento as disposicións contidas na normativa básica estatal e autonómica vixente, que xustifica e lexítima o tratamento dos datos persoais.

Novena. Modificación do Convenio

A modificación do contido do convenio requirirá acordo unánime dos asinantes.

Décima. Lexislación aplicable. Xurisdición

O presente convenio ten natureza administrativa e rexerase pola Lei 38/2003, de 17 de novembro, Xeral de Subvencións, e polo seu Regulamento, pola Lei 9/2007,

do 13 de xullo de Subvencións de Galicia, e polo establecido na Bases de Execución do Presupuesto Xeral do Concello de Lalín que estean vixentes xunto co presente convenio.

A Asociación Cultural Bolarqueira quedará sometida ás responsabilidade e réxime sancionador establecidos tanto na dita Lei Xeral de Subvencións, como na Lei Xeral Orzamentaria.


Das cuestións litixiosas xurdidas con motivo da aplicación do presente convenio, e non resoltas en vía administrativa, coñecerán os Xulgados e Tribunais competentes do orden xurisdiccional Contencioso-Administrativo.

En proba de conformidade con todo o anteriormente exposto, ámbalas dúas partes asinan este convenio por triplicado.

Lalín, a venres 24 de abril do 2026



D.^a Begoña Blanco Blanco
Concelleira Delegada de Cultura e Turismo



D. Pablo Romeo Chorén
Presidente da Asociación Cultural Bolarqueira

